

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
KANTONALNO TUŽILAŠTVO
ZENIČKO-DOBOJSKOG KANTONA
Broj: T04 0 KT 0058583 26
Zenica, 23.01.2026. godine**

**OPĆINSKOM SUDU U KAKNJU
-Sudiji za prethodno saslušanje-
KAKANJ**

Na osnovu člana 45. stav 2. tačke i) u vezi sa članom 241. stav 1. Zakona o krivičnom postupku Federacije Bosne i Hercegovine ("Službene novine Federacije Bosne i Hercegovine", broj: 35/03, 37/03 ... 74/20, u daljem tekstu "ZKP F BiH"), podižem

O P T U Ž N I C U

Protiv:

J. G., ..., osuđivan više puta ..., izdržao izrečene kazne zatvora, ne vodi se postupak za drugo krivično djelo,

što je:

dana 11.05.2024. godine, u 13,00 sati u Kaknju, u ulici ..., suprotno odredbama člana 4. stav 1. u vezi sa članom 20. Zakona o sprečavanju i suzbijanju zloupotrebe opojnih droga („Službeni glasnik BiH“, broj: 8/06), iako je znao da je držanje opojne droge radi prodaje zakonom zabranjeno, to je i htio, pa je neovlašteno radi prodaje kod sebe držao jednu plastičnu okruglu kutijicu plavo crvene boje u kojoj se nalazi prozirni pvc paketić sa sadržajem blijedo žute materije neto mase 10,769 grama, plastičnu kutijicu u obliku valjka, bijelo roze boje u kojoj se nalazi 7 (sedam) prozirnih i zataljenih pvc paketića, jednako razvaganih sa pojedinačnim neto masama sadržaja blijedo žute materije od oko 0,3 grama čija je ukupna neto masa 2,097 grama, za koju blijedo žutu materiju je vještačenjem utvrđeno da se radi o opojnoj drogi „Amfetamin“ koja se, kao takva, nalazi na Listi opojnih droga, psihotropnih tvari, biljaka iz kojih se može dobiti opojna droga i prekursora („Službeni glasnik BiH“ broj: 8/06, 103/08 i 51/11) i to u Tabeli II (Tvari i biljke pod strogim nadzorom) pod rednim brojem 1. Liste psihotropnih tvari, zatim jedan blister originalnog pakovanja tableta sa natpisom „tramadol 50mg“ sa 4 (četiri) kapsule - tablete plavo bijele boje neto mase 0,160 grama za koje je vještačenjem utvrđeno da sadrže psihoaktivnu komponentu „tramadol“ te preciznu digitalnu vagu sive boje sa manjim displejom sa natpisom na poleđini „QC PASS 200g/0.01g“, a koju opojnu drogu, tablete i vagu je dobrovoljno predao prilikom pregleda policijskim službenicima PS Kakanj o čemu mu je izdata potvrda o privremenom oduzimanju predmeta,

dakle, da bi neovlašteno radi prodaje držao opojnu drogu,

čime bi učinio krivično djelo Neovlašćena proizvodnja i stavljanje u promet opojnih droga iz člana 238. stav 1. Krivičnog zakona Federacije Bosne i Hercegovine ("Službene

novine Federacije Bosne i Hercegovine", broj: 36/2003, 21/2004, ... , 58/2025), u daljem tekstu "KZ F BiH").